

平樂府志卷三十八

藝文部五

文

創建麥嶺營記畧

金 鉅

麥嶺在縣東北六十餘里界湖南永州之永明江華等縣犬牙壤錯崇山綿亘實稱奧區添設同知一員並守備千把等於富川之牛巖小水峽長圳龍窩賀縣之開山洞分建營舍設兵汛防聲勢聯絡爲巖疆巨鎮

添設弁兵會哨疏畧

鄂爾泰

查富川賀縣之八都六大寨其寨名乃寶劍黃石

平樂府志

卷三十八

藝文 文

一

湧泉牛巖石密秀山其間尙有小寨四十餘處接連楚省之江華永明二縣並與大源一山相通其由廣濶百里凡八都不法獠獍一犯盜劫仇殺潛躲大源山內山高路險兵役不能追捕縣城遠隔八九十里鞭長莫及富賀一營額設兵丁又不敷防禦以致宵小出沒不時稽察匪易應請於六寨適中之麥嶺地方專設同知一員民壯三十名職司督捕添設守備一員千總一員兵丁一百五十名一同駐劄防範再牛巖離江華白茫汛二十里小水峽離永明白象汛三里應每汛添設把總一員兵丁五十名月與白茫白象二汛會哨又長圳

村離永明祖山岡十五里龍窩村離江華青絲井  
新設塘汛僅五里應各設一汛每安兵二十名月  
與祖山岡青絲井新添塘汛會哨又賀縣桂嶺汛  
屬之開山洞與江華嶺東汛交界亦屬要區應設  
立一汛以外委把總一員領兵二十名防守月與  
嶺東汛會哨如此則同知守備居中稽查以扼其  
要而各汛弁兵聯絡會哨以守其隘獠蠻畏威奸  
徒自無托足之地於地方實有裨益

創建麥嶺廳營記畧

麥嶺屬平樂去富川縣治東北六十餘里孤懸一  
隅環界湖南永州之永明江華諸縣諸不逞徒往

往乘險竄匿急則走之楚居民漸染頑梗刁悍之  
習弗可以文法羈縻而莽爲逋逃藪者久矣銛念  
此荒土愚氓孰非朝廷良赤子矧麥嶺犬牙壤錯  
峻嶺崇山綿亘於外有平城沃野饒水泉利灌溉  
於平樂實稱奧區則夫我疆我理經畫而與民更  
始者事奚敢後於是循地勢相機宜設要害營汛  
駐兵爲捍衛而又不可無文員彈壓平樂舊有同  
知一員裁廢爰議復設卽移駐以專督捕事庚戌  
春少保總制鄂公毅庵自滇南赴粵西議輒合會  
疏入告

朝議報可因委桂休通判吳大猷董工於麥嶺建同

知守備千總署各一所東西北三面環以營房共若干間其南則補築以城若干丈於富川之牛巖小水峽長圳龍窩於賀縣之開山洞分建營舍設兵汛防經始於壬□□春落成於癸丑之夏棋布星羅聯絡要險爲巖疆臣鎮云

杜莫寨石城記畧

徐作

永安在萬山中椎髻卉服之流其性獷悍與齊民異名曰猺獞州凡五里曰龍回者猺獞居十之七爲民者吳村張村三里寨杜莫寨四村而已四村中杜莫最鉅其地險其居民二百四十餘家三面阻山獨迤北平衍賊得馳突爲患自建州治以來

三洞山灣榕崙金麻諸巢嘯而攻村莫者凡十二焚掠之慘閭里蕩然萬歷元年賊攻吳村張村急予提兵深入賊懼始奔逸時大田廖君憲以贛州別駕來守永安亟詢禦盜之畧咸謂杜莫舊有堡其遺址尙存迺與民謀所以城之白其事於余余曰是乃永荔咽喉之地人民輳集之區頃緣塞垣崩圯迭遭寇患茲欲復舊堡甃石城實保障至計其舉之毋綏廖君首捐俸十金以爲民倡民以義助者共九十餘金爲石城一百八十餘丈高七尺有奇明年代巡臨江李公按平樂謂杜莫寨城有資防守奈何高七尺賊將埵視之宜增高乃各捐

俸揆時鳩工增高者五尺始事於乙亥冬迄丙子春竣事

永安州治記

明商輅

永安古蒙州地也蒙州舊治去立山縣西南五十步其地有蒙山蒙江州之得名以此年代久遠興廢莫詳考之地志唐武德間始有立山縣隸樂州樂州卽今平樂府則蒙州在唐時已廢或併爲立山縣未可知至國朝洪武乙丑邑民陷於草寇戶損過半知縣李昂奏革縣治爲古睂巡司隸平樂縣立山之廢又經百年各處獠獞樂其土地閒曠自相屯聚竊弄刀兵肆行劫掠居民違遠官府失

平樂府志

卷三十八 藝文 文

四

所倚伏反流移他境守土之臣間提兵深入殺戮未幾而兇獷愈熾卒未有思所以建置安輯之者成化丙申朝廷特命巡撫甘肅副都御史朱英總督兩廣軍務兼理巡撫下車之初邊務方殷而平樂府江之警尤急乃悉發桂林之官軍順流而下會命總府諸軍授以方畧分闔尅期進次荔浦破賊險隘賊畏威斂踪尋遂班師因謀諸總鎮同事者曰自古爲治貴威愛兼行勸懲並舉獠獞亦人耳貪生惡死未必不同此心矧今聖天子明德愼罰璽書屢下未嘗不以撫綏爲言吾儕受此重寄曾不此是議而惟終歲勤兵以事征討無乃非朝

廷意乎衆皆曰然於是推誠備榜諭以兩廣先此致寇之由與今所以弭盜之方司府賢而有爲人所信服者遍行招徠期在同心同德感格克禎復爲良善未旬月間梧州平樂等處撫安編籍名有成効立山獠老李恭著聞風知感首遣子扶寶等率衆詣軍門納款爲編氓乞復州縣永爲保障都憲具招撫之由以聞上深喜歡顧謂侍臣曰都御史言是四方萬里之民皆朕赤子□其征剿以爲功孰若懷柔以爲德卽日降勅獎諭許便宜從事都憲憫立山之民首先悔悟兼以其地深廣西阻大山實廣右之腹心獠獞之窟穴復立州縣以統攝之斯經久計也遂偕總鎮太監顧恒總兵平鄉伯陳政副總兵都督僉事白玉巡按御史劉喬暨三司議委副使范鏞參議謝綬都指揮王輔躬詣立山以建州之意驗厥人情土俗咸報曰宜遂舉桂林府推官閉魯爲知州上民李扶寶爲吏目合詞上請優詔許可名其州曰永安於是范鏞謝綬王輔率郡衛執事同知周尙文羅表指揮韓鐸王勛等卽其地披荆棘除草萊築城作池周八百九十步厥其門三包以磚石中建州衙正衙之旁爲幕署爲庫藏前爲六房爲重門次儒學有明倫堂有大成殿有齋有廡又次城隍廟廟之後爲倉廩

左分司右軍堡以至城垣街巷井井有叙分工興  
作庶民子來於時鎮守少監王舉巡按御史謝顯  
周蕃繼至右布政使沈敬適來暨按察使張黼右  
參政袁愷等遂相與董其成焉始事於成化丁酉  
夏五月至明年四月訖工鏞等復以各民丁糧通  
第高下編爲里甲以次應役又擇俊秀子弟八學  
延師訓迪文教聿興人心知勸落成之日衆口嘖  
嘖稱嘆謂百年梗化之夷弗事干戈一旦入於版  
圖轉殊音變異服奔走承順與齊民等於此知聖  
明之恩都憲之功大矣偉矣不有記載曷事後來  
於是沈敬范鏞謝綬暨僉事吳玉等具建置顛末  
走書求記昔有虞之時徂征有苗三旬而猶逆命  
益贊於禹曰惟德動天無遠弗届至誠感神矧茲  
有苗禹遂振旅而還厥後苗民卒來格於帝舜文  
德誕敷之曰我皇繼天保民專務德化而於統御  
遠夷率先撫後捕是卽帝王遺意也都憲仰體聖  
心者建大策弛兵威而布誠信安反側而奠邊陲  
將見遠邇嚮風爭先歸順兩廣軍民自是可以安  
枕矣若都憲者庶幾無負付托之重者哉而其建  
州設學編戶定籍籌畫綜理之勞范謝諸賢實任  
之是皆可書者也予故爲之記以復以爲來者之  
勸云

建永安尉署記畧

秦鼎榮

尉廳之廢大率廢於無官也自

興朝三十餘年員缺未嘗補卽補亦無至者康熙四  
年春余奉銓來此州民不識予爲何官曰自來不  
聞有茲矣恐銓者之誤而君其過聽之也少頃有  
父老來自遠方始顧而唯唯遂諭其未知者於是  
憐余爲

今天子之命吏跋涉千里且無家慨然餉余壺漿餽余  
竹茅余率童子親爲結縛而坐卧其中意甚適也  
無何而茅屋忽爲祝融一炬余朝夕以此爲恐急  
欲代以陶瓦而諸父老僉曰木雖產之深山第陶

平樂府志

卷三十八

藝文文

七

匠未可輕議耳請姑待之余以是年冬稍得俸遂  
購木數十頭俟其乾而募工輦致之明年有陶自  
虔過者留而爲之置瓦萬計又明年有遊於楚者  
於是募匠而成之冬匠來自楚遂建廳三間顏之  
曰循理佐以兩廂又建住房三間於西偏爲書舍  
兩間栽以花竹余朝夕處之因追思余來時州民  
未知其爲誰也卽前此之官此者又皆不知其爲  
誰也噫嗣可知矣後之君子咎其鄙陋請鑒於斯  
文

新立鄒公祠堂碑

宋張栻

故尙書吏部侍郎鄒諱浩字志完學者稱爲道鄉

先生而不敢斥其名字在元符中爲右正言以直諫顯聞初貶新州建中靖國之元入朝爲天子從臣崇寧二年又貶昭州處昭凡四歲歸沒於常州其立朝大節載在史官播在天下固不待紀述而傳者某獨嘗謂人臣不以犯顏敢諫爲難而忠誠篤志之爲貴士君子不以一時名節爲至而進德終身之可慕若公始所謂論諫蓋亦他人之所難言而考味其生平辭氣曾無一毫著見再位於朝憂國深切重斥荒涼凜不少沮至於病且死語不及他獨以時事爲念方其少時道德學行已有稱於世晚歲益爲中外所尊仰而公不居其成講究

切磋惟是之從蓋嘗從伊川程先生論學而上蔡謝公良佐龜山楊公時皆其所友也其任重道遠自強不息如此所謂忠誠篤至而進德終身者若公非邪故某樂爲天下後世誦之淳熙二年秋清江王光祖爲昭州道桂問政所宜先某告以道鄉先生當有祠盍圖之則應曰諾明年春使來告成且曰郡故有公祠紹興中守臣陳廷傑所建荒蕪久矣故其地卑陋亦不足以奉蒸當按郡城之西北有所謂得志軒者公所嘗遊歷也下臨長塘曰木梁廣數十畝羣山環於前其秀曰龍嶽舊爲郡士張雲卿之居公實名而記之棟宇今無復存者



乃卽其地爲屋四楹繪公像於中門廡悉具又葺茅其下俾張氏之後人居而世守之敢諸記某旣爲之說而且有感焉國家列聖相繼以納諫容直爲家法人臣雖甚觸忤亦不至如前代加以重辟間有暫貶徙者旋卽復還且又進用俾得以名節始終顧扶持公論培固邦基雖有賴於多士之助而其長養成就實非一日皆自列聖深仁厚澤來也聞公之風者亦復有感於斯乎

茅公祠碑畧

明 孫有敷

歸安茅公之視府江也事在嘉靖壬子間至今上辛卯余謬以蒼梧之役往來府江道中習聞其事

迺若干年方飭憲是邦適獠人初剿增兵築城闔郡士民相率諸庭泣下言曰吾儕不幸而生砦荒之隩也日夜惟草竊勾連怙我村落是懼故惟飭憲使君載旆秉鉞是仰前使君茅公征剿之功至今有赫且陽朔縣祠矣獨可令平樂稱闕典乎祠宇之費自爲聚辦惟請長樂陳公祠旁官地一區予曰善檄郡歐陽守相地給之民惟子來趨事不數日而祠有次第夫黎庶之口不易齊五十年之名不易起今平樂人之談茅公如出一口江上之祠煥如翼如所謂公論久乃定也故五十年而祠興焉於是乎爲記其事茅公名坤嘉靖戊戌成進

士由精膳郎陞廣西按察僉事

重建趙公祠記畧

明張惠

公姓趙諱明世居富川霽石登宋咸淳進士第出守湖南辰州明允仁恕政尙敦龐搏牛之虱而漏其蠹猶恐傷手焉值宋室不綱羣奸弄權遂拂袖以歸公歸鄉躬耕以供國賦有不便於民者復具疏以請以甦民困旣歿陰庇鄉民靈迹甚著鄉進士李伯宗建祠以祀廟號龍歸謂公爲龍遊行而歸也每有祈禱輒應寇盜猖獗終不敢犯我邊鄙皆公之賜也迨我皇明嘉靖丙申伯宗之裔復修葺之越辛酉歲其裔李宗昭判常熟歸來又合弟修之索記於予

平樂府志

卷三十八

藝文文

十

迎仙洞記

明羅黃裳

萬歷四年夏五月端午余謁督府於蒼梧且計事竣沂流還平樂道經昭平會府江雨下如注瀨湍急舟人有難色余索民間竹輿舁從陸路凡歷里埠蓬相桃嶺石面諸竣坂盡四日將達平樂郭東十五里有峰峭厲獨峙約高廣千餘尺中扃崑洞儼若天造石屋呼田叟問之曰此名珍珠崑昔有異人棲住煉丹丹成羽化而去余異之攀磴援蘿入憇洞中盤桓瞻盼錦石繽紛交錯如垂瑤如□玉如累茵如伏獅馴象詭狀百出中復有石徑

縈紆虬轉躡之若上通洞天石牀石臼丹竈俱在  
杳與塵世隔絕余因命石工乘天作之勝聊除榛  
莽加甃砌未幾會余有覲行厥工未竟越明年夏  
六月余復視郡覩八屯妖氣屏息四方底寧乃更  
遣千戶朱濂鳩工繕治之不越月洞前渠道成洞  
口亭軒成洞心石砌成遂命僧結廬守之余每政  
暇偕郡貳林君郡倅程君司理陳君往游洞中舉  
匏樽相對盡歡忘形物表縹緲此身若跨青雲振  
羽衣於蓬瀛山島間矣特扁其洞爲迎仙云

賀縣縣學記畧

袁 衷

賀縣爲嶺南名邑卽漢之臨賀也學在縣城之東

永樂十六年主簿傅岳教諭李滋因其舊而修剏  
之歷歲旣久間有摧敗成化三年冬興安蔣智以  
太學生視篆於賀適桂林府學司訓番禺馬超來  
董學事同心協謀乃召土木灰石陶瓦諸工以籌  
費旣又曰士廩薄不可以不給也民力瘁不可以  
重勞也則又出私帑與俸入之羨以爲倡邑之篤  
於義者或忻然助費凡官於賀者業於學者巨賈  
富商之寓於是者亦出錢捐貲以助役肇功於成  
化五年仲春望日自禮殿至兩廡櫺星門悉易其  
壞而丹雘之作儀門飭先聖先賢像其明倫堂東  
西齋神厨神庫宰牲之房庖滌之所與夫諸生講

學會饌之舍靡不次第繕修煥然一新矣

重建富川縣學記畧

王淑京

富川學崇禎末毀於兵

國朝定鼎後知縣雍公重建而張公復修葺之迄今四十餘年棟宇頽敗康熙癸巳郡守高公茂選行部至富川顧瞻殿宇盡然心傷卽捐貲命縣尹三水梁公子豹營建而令司鐸朱若遜董其事其年十月大成殿告成未幾梁公解任去山右王公汧署縣篆復建兩廡已丕基初立矣然草創之餘規模未備余承乏茲土爲之捐俸若干鳩工庀材相與協力經營之邑中紳士亦共襄乃事不逾年而啟聖有宮明倫有堂尊經有閣名宦鄉賢有祠師生有舍以及櫺星戟門泮池月橋次第告竣工不擾民貲不費帑始於癸巳冬十月落成於丁酉秋八月

按縣志尊經閣今廢

重建富川明倫堂記畧

周方燧

縣故有明倫堂在學宮之後規模狹陋棟宇朽壞前令湯君奕濬謀於邑人闢而新之功未竟而予來代周覽學舍思繼前勛不數月以事落職留滯茲土殷然於懷今邑侯聞人君棠之至也政修人和百廢具舉而堂適成堂宏偉高曠廊廡門序環

翼森嚴凡良材堅甃工所需則邑人士率錢若干以奔走趨事而司鐸莫君安近潘君馬圖實董其成經始於丁卯七月落成於辛未五月

荔浦縣學記

元 石天岳

桂林之南二百里有邑曰荔浦僻處萬山中草木叢茂居民鮮少至正己丑冬予捧檄來佐是邑至任三日謁夫子廟於城東視其殿宇則荆棘蔽芾風雨震凌獸蹄縱橫於門廡間詢之父老則曰是邑東接谿峒獠獠混處比年以來出沒剽掠殆無寧日兵旅數起飢饉薦臻民皆巢居巖處纍石結寨以偷生學校荒蕪職此之由予聞之心怖神悸

不遑寧處卽圖興修然視其民瘡痍者未蘇移徙者未還如是而役民亦聖人之所不與也遂捐廩粟姑畧補葺爰率諸生徒以興講肄業數月而衣冠文物濟濟可觀越明年庚寅寇盜少息四境無警士之遊於宮牆者頗有中土風予思夫子爲萬世之師學校爲育才之地作新之役豈容少緩乃召諸生而諭之曰夫禮飲食必祭者所以祭夫先代始爲飲食之人蓋以吾之所以得此者皆斯人之力示不忘本也吾夫子之道爲天地立心爲斯民立極爲萬世開太平今天下之人君君而臣臣父父而子子得遂其生得復其性不淪於禽獸之

域者皆吾夫子之所以教也於口飲食猶知報本而聖人之教乃忘其所以自惑之甚也况我聖朝以禮樂治天下以忠信厚風俗列聖相承法度昭著而於聖人祀典尤拳拳焉今聖天子在上文命誕敷聲教遠被九夷八蠻罔不臣服邊郵寧謐海宇清泰報本崇化厥維其時茲欲以夫子之廟改而新之與諸生優游仁義之府顧不躉歟衆悉欣然願聽規畫於是教諭劉復考其歲賦究其侵欺凡豪民之耕占影蔽者悉明經界以復之頑佃之積累負逋者嚴加約束以徵之由是而廩有餘蓄歲計常足足以經營乃掄材鳩工相其便宜度其

高下汗者除之卑者崇之方欲擇吏之能且良者以掌其事而難其人縣之所隸南源巡檢董震乃儒家子遂委敦匠役而能竭誠殫慮克盡其勞幕賓秦仕奇相與立規矩計程度以成其事訓導龍弼朝課講之暇協力董役不數月而殿宇門廡穹然赫奕可謂輪奐美而成功速矣工始於至正十年之冬殿成於十一年之春遂次第書之以志其事非敢以矜能而耀美也蓋欲使後之同志者相繼而不怠云靜江路荔浦縣主簿兼尉石天岳記

重修荔浦儒學記畧

吳梁棟

縣治舊在今城之南地勢淺薄僻連猺獞景泰丙

子歲移城於茲學亦隨以遷迄今六十年而殿堂齋廡倒坍殆甚生員蘇澄等始請諸當道咸曰學校爲政首務允宜新之會應山楊侯以遷任去周侯適繼知縣事下車初卽引爲己任凡其徒庸之計財用之須皆侯之操心也維時備司裴公綱力致贊襄巡司林君夙夜敦匠期於必濟今皆棟宇深宏規模爽豁矣計用在官銀二百五十九兩二錢不敷者侯捐俸倡之肇工於正德庚午歲仲冬之吉落成於正德壬申春之二月

重修荔浦儒學記畧

明 李宗節

儒學與縣治並建天順初邑侯伍公遷今縣治之

西依城而居師儒並得講業橫經無蕩析流離憂用以妥聖靈興人文甚盛舉也時方遘亂夷酋不靖士各廢業科目之英寥焉無聞壬申王師大征三峒渠醜盡殲地方稍寧輯迺好事者復申言於上改今學維時干戈甫定規制卑陋木質匪堅不一紀而殿堂齋廡啟聖名賢三祠仍荒圯猶故其明倫堂之前湫隘淺逼不可以容多士而羣諸俊也侯涖任之三年政成事舉民庶咸欣迺謂儒學之役今固不可後也集諸鄉先生與博士弟子員商之衆唯唯曰可遂掄材飭工估其直以聞於上僅計帑積七十餘金衆咸謂前者改遷二次皆費

金三百餘兩而侯所佑不滿百金卒事之謂何侯  
竟身任之召集諸匠作指畫區授不爽尺寸始於  
癸未之冬畢於甲申之秋役有節而民不勞工有  
程而餼不濫財有式而費不浮自堂宇齋廡及儒  
官廡舍視昔數百金之費節省數倍而體制有加  
又擇官地閒曠者與居民葛廷鳳滿廷蘭換地直  
六丈橫十二丈將明倫堂退入四丈而廷除馳道  
益宏邃改觀矣工成多士屬予記之

永安州學記

明 陳獻章

立山復州治之幾年今雲南左布政使樂安謝公  
綬始領右方伯之命來廣西其民舉欣欣然喜而

相告曰公復來公復來廬陵彭君栗適知州事問  
於諸父老諸父老踈而言曰是再造我民者我何  
可忘吾州古蒙州也唐改立山縣國朝洪武間革  
縣爲古睂巡檢司時草寇竊發民亾者過半比年  
以來猺獞橫據其地盜日滋而民日孤成化丙申  
巡撫都御史朱公英督而廣軍征荔浦破賊賊懼  
招之獞老李恭著首遣其子來納欵公前以參議  
佐巡撫於戎議城立山立山本州治在桂林平樂  
之間爲藩腹心今之憂無控暴之地以居民耳州  
復則民定尋請於上許之乃營立山是役也公與  
按察副使范公鏞都指揮王公輔更主相之明年



丁酉州治成方進軍荔浦時桂山巖恃險後下一  
軍怒將盡殲之公廉其脅從者得七百餘人釋遣  
歸農賊以此傾信招所至獠獍視我立山咸來此  
公以好生一念之仁代血戰數萬之兵也今也吾  
民之亾者復復而爲州昔之賊吾民者今革面爲  
編氓我有農桑我有塾庠生我有養死我有藏公  
之再造我民也我何可忘於是彭君籍記諸父老  
之言將碑於學宮以傳而謀於提學時可周先生  
周先生三致彭君之懇於予俾爲之記嗟乎彭君  
誠不私於公而思惠其州之人士乎請爲言之七  
百死命歸農何致羣凶之納欵州亾州復在民何  
平樂府志

卷三十八

藝文

文

十七

關於公之一念動於此應於彼默而觀之一生生  
之機運之無窮無我無人無古今塞乎天地之間  
夷狄禽獸草木昆蟲一體惟吾命之沛乎盛哉程  
子謂切脈可以體仁仁人心也充是心也足以保  
四海不能充之不足以保妻子可不思乎聖朝倣  
古設學立師以教天下師者傳此也學者學此也  
由斯道也希賢亦賢希聖亦聖希天亦天立吾誠  
以往無不可也此先玉之所以爲教也舍是而訓  
詰已焉漢以來鄙也舍是而辭章已焉隋唐以來  
又陋也舍是而科第之文已焉唐始濫觴宋不能  
改而波蕩於元至今又陋之餘也夫士何學學以

變化氣習求至乎聖人而後已也求至乎聖人而後已也而奚陋自待哉孟子曰人皆可以爲堯舜周先生師表一方彭君爲州守謁文山澤之癯非俗吏是以冒言之諸生疑焉請質於周先生其必有興起焉者甲倡焉乙和焉俛焉孜孜其溥溥多化寢博其於公也有光焉則斯文也其猶庶幾泮水之頌歟於是乎書

廣西都元帥章公平徭記

元虞集

昔在世祖皇帝神武不殺威加四海際天盤地日月所照莫不來歸混一以來嘉惠遐域慎牧守整軍旅隨其風俗皆有以遂其生養之道察其習氣

之偏而齊之使不得妄作此至元之治所以無間然也地大物衆豐豫繁息而有司寢弛於無虞而慢暴之漸興矣桂林之所統踰絕高險外薄海島幅員數千里山川鬱結瘴癘時起朝廷寬其徭役簡其法令吏乎其地者秩優而俸厚蓋所以哀其遠而安其生者也而其俗之難制則固有之若所謂曰生徭曰熟徭曰獞人曰款人之目皆強獷之標也曰谿曰洞曰源曰寨曰團曰隘之屬皆負固自保因以肆暴之所也然皆有血氣之親口體之欲苟得所養而安其所利其情狀可知也撫字以其方責厲以其義號令以其信堅甲利兵以臨之

則悍然不顧勃然不遜者或寡矣或者欺其遠弱而無告掎克殘忍之不厭是非不明而舉錯顛倒以害其生以拂其性雖善良懦弱尤不免於動作况素不知教令者乎數十年來扇動弗息朝廷未嘗不思所以理之奈何執事者之弗恪非常之賞昧於黷貨之欺而用否之差徒足以敗事而興誚經事酋卒所忌者制郡縣以扼其要害置廉吏能將以參錯其出入因其勇黠而用之官軍之脈絡貫通豪壯之心力效命陰謀無所容妄念不敢作又以忠性廉介之官蒞其上明耳目公賞罰而持久焉不知出此而屢失良計以勞我將帥士大大

於奔走勞苦可勝追悔乎今上皇帝卽位之明年爲元統二年相臣樞府用外省之列薦以處州萬戶之鎮撫州者濟寧章公伯顏拜鎮國上將軍廣西宣慰使兼部元帥佩金虎符以總其軍是年冬十月猺寇以其衆起賀州富川縣之境入其縣大掠其民公整軍以出湖廣行省右丞完澤帥湖廣之兵來督戰至軍而病以軍事屬公公軍逼賊擊破秀峯桃溪新田野豬等寨斬首二百級繼而右丞病卒公以隨省某處萬戶之軍以行公親臨陣射其旗頭一人賊二人奪其寨門連破小溪猺源等寨盡克之生擒其酋唐七二十一等六十一人

斬首八十一級寇勢未已據其山險連引數百里  
大掠賀之臨賀富川亦出道之永明江華公分調  
諸軍攻其要害擒斬二千九百六十七級復富川  
縣得邊蓬巡檢所失印招邑民還業是年潰寇又  
攻平樂府之恭靜江之陽朔三年正月公整軍捕  
之湖廣平章探馬赤至軍公軍破寇所據月虞等  
一十三村獲賊一十七人又破涼涇源得賊一十  
一人又破大厚黃辛等二十二源擒斬一千八百  
九級仍改至元元年七月口兒只顏以湖廣參政  
兼都元帥來與公會捕破靈川縣境口田米落等  
處潰獠之復聚者斬首三百級而公諭其酋潘光  
叔陸秀琳等來歸得戶百廿六大小九百八口歲  
願輸租三千餘石十月十九日擊臨桂縣慕化鄉  
之邊山慈洞斬首三級獠寇盡潰發其巢得僞鈔  
板印旗甲戈弩及所殺命官之袍笏得爲鄉導者  
龍表一等四十六人梟首以示斬餘寇八十餘級  
得脅從者男女四百三十人復其業十一月以詔  
書按兵而詔之得義寧荔浦縣咸水等二十餘處  
酋潘三十一等金紫等二十一源酋俸傳四藤之  
岑溪縣酋沈明等潯賀等處酋李百七皆詣公降  
計其地凡一百七十八處戶八百八十一大小男  
女凡二千四百餘口公引大兵屯柳州謀報賊攻

賓州公引兵出象州抵來賓縣二年正月十一日  
寇三千餘人據北三都公遣千戶王世英往敵之  
未接戰公帥屯兵萬戶忽都答兒引兵至石橋與  
賊遇道隘賊據險戰不得地公引軍至五里塘成  
陣以待賊分三隊圍官軍公麾下射殺三人忽都  
答兒等射殺六人射殺突入者旗頭一人有賊挺  
身奮戈出當吾陣屯兵百戶陶廷蘭識之曰此賊  
首梁四也急擊之不可失官軍急擊之遂斬梁四  
及從之者六人賊少却保山頂下矢石以攻我軍  
公發火炮焚其寨軍士四面搆緣以上連戰者三  
公手射者盡殪矢箠爲空斬首八十九級擒其尤  
强悍者十七人賊潰二月四日追襲至賓州得常  
抗官軍者十二人斬首七級得上林縣尉所失印  
又殺世爲獯鄉導者潘壽獯人從賊者韋明等二  
十六人皆梟之寇北三都之餘黨保巖洞以竄謀  
知其處擁草洞口焚之無得出者時暑水溢師還  
靜江九月公與省臣分道追寇十月十日抵慶遠  
知賊出海北之境引兵出橫州至欽之靈壁與省  
臣之軍會攻賊賊潰又分公軍出永淳寧浦縣貴  
州擒六十一人斬首三十八級得所掠男女六十  
九人還其家十二月三日會首臣洪水埠渡江入  
慶遠大安定連擊中廓屯營盧村洞擒其酋盧權

盧開斬首三級得所掠良民遣還其家十八日攻唐妙隱洞擒首賊唐公猛等二人唐遜等十人三年正月九日公分擊中廓洞賊乘高墜石擊官軍公遣兵出從間道上擒其酋譚公顯等七人斬首二十五級得所掠良民遣還其家鞠公顯問海北寇酋所在公顯云韋千四在北江田巖洞從其言往擊之其山千仞壁立不可上寇又礮石毒矢雨下公購軍中作飛橋直抵其巢擁軍積柴洞口乘風爇之韋千四棄其衆走捕得之其洞火數日乃絕委積家屬殲焉又與省臣分擊上下廓蘇村潘村等寨日有斬獲道險糧運不得至采野菜以食與省臣引兵來賓州二月十一日有詔亦以江西行省某官統某處萬戶兵平章忍都魯迷失海牙總之湖廣之兵平章某總之兵既合兩平章議擇勝兵二十萬戶三人以屬公公引兵擊古野古晚杳洞擒八人斬首三十五級行次賓州遷江縣得古杳之餘黨十一人戮之督州倅張宜子擒寇海北之餘黨潘千五等三十九人斬首二級三月五日擒古杳餘黨之酋梁七等二十二人初九日慶遠民陳中達詣軍門言柳州皂嶺李全甫子姪僭稱王號執我萬戶哈刺不花殺千戶乃蠻歹流刼鄉村燒倉庫累降復叛投充屯獐窺伺兵機聞兩

省合兵彼懼而逃去未易可得禍未已也公素知李之橫如民言督千戶蔣元鳳誘之出設伏擒之並李萬盛韋包弟又遣萬戶劉某與答刺罕及願自効之軍分捕其黨擒一百二十六人斬首三十二級十三日還與兩平章會擊口山上錦黃峽水確滑石等寨擒一百三十一人斬首七十四級公與平章議留兵守要害而息大軍於嶺外公之威聲久著封部藉以少安矣公之同爲帥者某人某人相繼或除或代數年之間日夕軍務之勞則惟公而已行省以公功言於朝者凡幾章省臣列奏公功天子爲遣使賜對衣尙尊以勞之所奏立功

石之委折皆密識之開轅門以延見四方之士無  
旦暮皆得通謁無小大貴賤皆得以輸其情厚薄  
往來曲盡其善是以上下遠邇如指諸掌兵如烈  
火玉石俱焚重賞之下首鹵或濫公則拳拳於被  
掠脅從之人而護之歸軍簿論功勢賄交患一失  
其當衆心解焉公則屹然不移惟是之用所部歲  
當遷補擬注者常數百人皆當其任而無所私歲  
用糧三十餘萬石而不徒費此皆古昔良將之能  
事而公優爲之是以能致勝而持久也初廣右之  
師老益以答刺罕之兵勇悍驍疾所至多克稍失  
其馭不無傷殘則欲請於上立部伍定爵秩嚴法  
令明紀律而當險要之衝焉慶遠深入南丹荒阻  
而延袤有罪亾命之徒潰散未絕之寇日增月益  
萃爲淵藪又欲置官府連營於其間以戍之使不  
得動作文書屢上朝廷必將信用之爲無窮之利  
便者其在此矣予與公有一口之雅以余嘗忝國  
史也數錄其功多之目以相示集歷觀國初之位  
置中間之因循今日之攻守使後來有所規隨故  
爲作平獠記至正元年五月甲子前史官虞集記

報連山賀縣捷音疏

明張岳

題爲捷音事照得先因廣西賀縣弓山礮石黃峒  
等巢積年賊首倪仲亮李三弟等廣東連山縣黃



南梅水大曲等巢積年賊首李金石住等各結黨  
嘯聚相煽爲亂流劫鄉村殺擄人財奪占田土民  
不寧居貽患三十餘年節據連賀二縣被害排年  
軍民黃昂黎得春等連詞具告請兵征剿已該臣  
會同鎮守兩廣地方總兵官征蠻將軍太保兼太  
子太保平江伯陳圭議得前賊惡積已盈流毒甚  
慘屢撫屢叛勢在必征調到廣西鎮安思明田州  
南丹東蘭那地向武都康泗城歸順上林等府州  
司縣土官目兵並兩廣漢達官軍民壯打手人等  
分爲二大哨一哨賀縣委鎮守廣西地方副總兵  
官沈希儀統督廣西按察司僉事俞則全監督指  
揮李琮孫文繡陳棟鄒繼芳卞爵莫如爵等共兵  
五萬九千五百七十七員名進勦弓山礮石黃崙  
等巢首從賊徒一哨連山縣委廣東布政司左參  
議朱憲章監督廣東都司署都指揮僉事梁希孔  
統督指揮莫如爵黑孟陽李涇王煦共兵二萬零  
七百九十員夕進勦黃南梅水大曲等巢首從賊  
徒及行湖廣巡撫衙門督行郴桂衡永上湖南等  
道兵備分守分巡守備等官各調集官兵鄉夫委  
謀勇指揮千百戶等官管領把截尅定嘉靖二十  
七年正月十四日寅時一齊抵巢按圖撲勦應與  
湖廣官兵夾攻者約會夾攻仍委廣西布政司左

參議朱道瀾總理賀哨廣東布政司監督左參議  
朱憲章兼管總理連山縣哨各軍前糧餉會本具  
題外續於本月二十一日據賀縣哨監統副總兵  
沈希儀僉事俞則全呈報並連山哨監統左參議  
朱憲章都指揮梁希孔呈報及據湖廣按察司整  
飭郴桂衡永兵備兼分巡上湖南道副使潘子正  
呈稱各前來臣等查得連山賀縣二哨官兵通共  
擒斬首從賊人賊級三千零十九名顆俘獲賊屬  
二百八十六名口奪回被擄男婦四名口奪獲牛  
馬二百七十九頭匹器械一千零五十八件俱經  
巡按御史蕭世延楊以誠原委紀功廣西按察司  
副使沈宏廣東按察司副使黃光昇閱驗審勘明  
白獲功官軍目兵各照賞格給賞陣亡被傷者給  
與銀兩以爲營葬及湯藥之資生擒內有詞者監  
侯另議情真無冤者遵照兵部奏准嚴法令以靖  
地方事例押赴市曹處決器械貯庫被擄人口給  
親完聚俘獲賊屬牛馬俱變賣價銀八官其湖廣  
官兵所獲首從賊人賊級賊屬等項備行該道俱  
徑呈彼處按撫衙門定奪委官紀驗施行外臣會  
同鎮守兩廣地方總兵官征蠻將軍太保兼太子  
太保平江伯陳圭議照廣西賀縣接連廣東連山  
縣地方密邇湖廣江華等縣崖崙深險林箐叢密

各賊盤據負固肆兇東攻則西遯西攻則東遯急之則走入險阻緩之復糾聚出沒正德年間雖曾具奏征勦賀縣特以一面進兵不曾會合三省致使殘黨旋復嘯聚如賊首倪仲亮鄧良朝梁榮李金石住等合衆數千僭稱名號焚掠村寨占據田土逼近關廂禍延三省劫掠得志黨附益多各處無賴姦民投八夥中導之遠劫至於德慶開建等州縣亦被其害若不急勦滅誠恐後來愈熾深爲未便臣等動調官軍土兵行委副總兵三司等官統領進勦幸致克捷卽今地方之患已除神人之憤獲伸舊民復業安枕而臥是皆仰仗皇上聖武宏敷天威遠振故能兵不留行賊無堅寨豈臣等犬馬微力所能強致

府江紀事

明茅坤

嘉靖辛亥春二月予由南京禮部精膳司郎中陞廣西僉事時頗聞執政所構竊自憐願爲棄官投檄矣秋七月適應警菴公檄總督兩廣輒遣吏移文強之且再予始以壬子入粵右諸道惟府江爲最險兩岸山旣壁立盤礴六七百里而又叢木深箐諸猺獞數出沒劫殺吏民正德間陳公金大征無功而府江道兵威不行遂以孤壘與諸猺獞相羈縻而已陽朔縣特甚陽朔抱江而城蓋縮府江

之咽喉者數十年來古田諸部落劫殺吏民稍稍蠶食諸州縣甚且縛陽朔縣令及其哨江百戶殺之督府歐陽公輩嘗疏請三省夾勦未果已而應公至陽朔吏民之泣而請兵者朝且夕也比予至公輒以署府江道檄予且以大征一切軍興事宜屬之予抱檄行部稍稍按往牒及帳下吏士諳兵事者大略治南粵諸夷莫善於鵬勦莫不善於大征何者夷雖醜類其兇悍鴛鷺者特十之一百之一而已擇渠魁而鵬之而餘不以及則諸部落罪案始分人人知懼大征則堙山刊谷而部斬之矣其爲功莫真於鵬勦而莫贖於大征鵬勦者師不移時倏而入倏而出如鵬之搏兔然故其爲功最真而大征者非徵兵儲餉至踰年不辦兵未集而賊皆走險矣其始也兵連禍結其繼也率斬他馘以緩罪故其爲功多贖然當事者往往利附大征而不便鵬勦大征之師如泰山壓卵奏捷之後輒冒爵賞而鵬勦之法少不利則罪且收坐之矣予故深憂之又按故當事並知鵬勦之善而不敢遽行者有三一曰將士不勒習二曰嚮道不審三曰機事不密予按部署諸戍兵凡五千汰其老者弱者及括其空名而隸尺籍者於是嚴之以古者什伍之法使之朝夕勒戰而上中下其食焉上焉者

則授之摧鋒或爲伏隘而以將領之驍悍者統之次焉者則列枹鼓赴干櫓而以將領之老練者統之下焉者則以給兵馬儲糗之役而已又日出金錢分給諸將領各自以所部署之兵相團射及其槍牌諸技於是人人頗願自爲戰而又以嚮道不審者諸獠獞并阻山谷之險懸崖飛棧深林茂箐故也我師之偵者旣不得入何以測彼已習向背而覘綏急於是別募死士爲緝事軍且令各攜善繪事者而入夜行晝伏分道深入至則各圖其山川道里以出某賊巢爲左某賊巢爲右某巢枕某隘某巢控某江某巢與某巢相姻黨當別爲行間

某巢與某巢相讐殺可遺金錢使之相夾擊而其圖又恐邏者之偵及也以藥筆傳之紙絕無可覩見者出則又按圖別聚沙爲山谷狀不二三月間而府江所轄諸夷砦其最狡且險者八十二處稍次者亦不下百餘處大畧並如掌股間矣然亦不敢輒案舉鵬勦之法惟日以戍兵巡邏山谷間又往往刺熟獠獞者出之稍稍犒之以牛酒甚且資之以金錢綺繡針線貨物已而諸熟獠獞又以予故推誠拊之也亦徃徃以黨中陰事或相讐殺及其險夷時時向予指畫予輒厚遺之而歸又未幾他獠獞故行劫殺者且患予或按兵鵬勦亦時時

隨諸熟獠獐出行謁矣予亦厚遺而遣之間擇其  
罪案最著者大桐江輩刼殺吏民數多予僅剗一  
酋之目以歸當是時予雖未嘗按舉勦之法而諸  
夷酋故行刼殺者夜日挈妻子竄山谷晝則携之  
還故穴而風雨凍餒恐恐朝夕矣已而入監鄉試  
事既竣陽朔吏民復告急應公且檄予而授之曰  
大征陽朔事屬君久矣君且指畫若何予前日大  
征事非陳兵十萬不可爲功兵志曰興師十萬日  
費千金奔疲於道路者數十萬家且陽朔諸獠本  
古田部落其遺種不下數萬若三省夾征則兵連  
不解爲患匪輕矣由予觀之治夷如擊狐出則疾  
刺之不出則聽其穴伏而已毀城薰社非計也倘  
聽某鷗剿不煩軍門一卒之勞一金之費而陽朔  
縣可完江道可通矣公又曰鷗剿恐不可多斬馘  
少則賊不畏且奈何予又前言曰陽朔塹江而縣  
左則金寶頂等三十餘砦右則鬼子等十七砦相  
爲表裏者也鬼子等賊殺縣令張士毅以來非惟  
官府吏民憤之雖其黨中諸部落亦深嫉而怨之  
何者策督府必征故也某若聲其罪以鷗剿之兵  
而按行大征之法則其黨中亦懼而且謀自完不  
敢移兵相抗矣况鬼子砦前則帶江背則枕恭城  
扼其江則諸賊必奔恭城恭城遠近讐其刼殺久

矣可盡而俘也公曰善予歸括所部署得戍兵千人先遣千人隸都指揮鍾坤秀於擂鼓巖卽控金寶頂故處以斷其右臂者也而諸獐中日遣其黨偵予兵動靜雖予之左右吏胥亦時時與之私金錢者且鬼子砦亦揣知吏民數請兵故期以十月賽神起兵稱亂矣予乃分所部署兵爲七各按日時或詐渡荔浦而東或越富川而南或扼陽朔江而脅或從恭城而背或從平樂而突並夜則啣枚晝則伏山窟中所過道立幟而輒榜曰軍門且進兵十萬討某賊砦矣他各閉砦自完無得擅出及舉兵相嚮舉兵相嚮者輒移師夷之當是時予之戍兵僅五千人特分道疾入而又以兵扼江江東西斷而爲二諸夷酋並瞻四望旗幟彌山谷固不能測官兵若干也雖諸將領亦各自按牒分兵力攻抑不自知官兵若干也不終朝連破十七砦而予又以恭城諸鄉兵及他熟獠兵伏賊之隘於是結營而蒐前後俘斬及生擒共二百二十二人並被擄幼口凡千人以歸是役也軍門遂不遣一卒不費一金而所奪還民田且十餘萬畝矣旋師之日懽聲動地非獨陽朔孤城得以稍完而他州縣凡被夷酋所占沒田廬與刼掠牛羊男婦者並來歸相屬者如市應公始列其事於朝天子爲之加

公兵部尙書平蠻將軍鎮遠侯已下賞賚有差予亦與都指揮鍾坤秀並陞二級提學王宗沐書其事於陽朔江上而鄉大夫蘇公木輩相與帥吏民伐石而碑並祠應公及予與鍾坤秀三人於其縣此則予之署兵府江之本末也軍門志亦載其畧大較以鷗剿而行大征之法古今所創其以獠爲導俘斬數多且千人已上抑亦古今所未覩者他欲築廣運足灘二堡以屯戍兵並槎府江兩岸諸山且訪唐宋故事令夷酋各出竹木香蠟諸物與之互市魚鹽以爲利又議永安修仁一帶韓襄毅公所剿殺太多雖設五屯千戶所以戍守其中然

於今實贅疣也莫若招東蘭那地黃丹州子孫衆而土狹者聽其分兵戍守且耕且戰願得其地而籍之者聽倘於五屯之間設一夷州如東蘭等土目故事亦古人以夷治夷之法也會予明年改爲大名道副使事雖未及施行而粵之人至今猶有按其說而傳之者隆慶二年十二月望日書

府江善後疏

明

郭應聘

一曰改設土司夫欲弭盜原先據要害今荔浦之峯門南源修仁之麗壁市永安之古睂各巡檢司皆久沒於賊宜悉革罷易爲土司一移東岸營於水滄募兵二千人分屯平嶺仙家冲諸田一移西



岸營於仙迴高天龍頭磯募兵二千人分屯六內  
六章馬尾黃牛諸田一移上峒營於古西募兵千  
六百人分屯峯門六喃諸田一移下峒兼轄西岸  
營於東線募兵千人分屯大宅東瓦諸田仍復廣  
運足灘二堡以重巡緝土司於兵領中擇有才勇  
者充其職俾世守焉其不効者更置之二曰更設  
參將夫控要害置土司分兵屯守不有將領以統  
之何以整齊約束重示彈壓也昭平舊有坐鎮都  
指揮一人第事權稍輕遷代靡一宜改設參將兼  
制桂平凡兩岸三峒諸土司盡以屬之練兵簡衆  
戢夷防奸其有獷悍不逞者得相機鵬勦不爲遙

制三曰開通水陸向者諸獠占據道路榛莽今蕩  
平之後宜開山通道疏拓險阻西岸自昭平明洞  
源洞以達仙迴自仙迴達古蘇永安自藤灣達馬  
尾象磯達田冲龍頭磯抵府治東岸自昭平里步  
以達水滄達平西羅山及十三屯自羅山舊途達  
府治而入於沿江開縵道以便舟挽募商伐木恣  
其採取俾鼠潛蟻附者無所容而風氣亦因以漸  
闢四曰酌處兵費三峒兩岸設官營堡屯卒幾七  
千人鹽米之需人月給三錢屯種建築諸費不與  
焉初年約二萬有奇梧鎮司府之藏調節而均給  
之次年墾田所出足以自養止勿給五日預定縣

治府江距蒼梧五百里許中間山谷窈杳林箐蔽  
虧片影孤帆行同異域稽之故牒唐宋時設龍平  
思勤馬江沙亭數縣後胥爲蠻占沒今昭平卽龍  
平地也江之西澣廣衍寬平風氣攸聚宜卽其地  
創一縣治以平樂之昭平馬平二里富川之二五  
都賀縣之招賢鄉上下半里割而益之總其賦得  
三千六百有奇而仙迴諸田稅盡以屬之六曰處  
分田糧兩岸三峒諸區覈賊遺田計四十萬畝有  
奇舊屬平樂荔浦永安者今民復業輸徭賦如故  
各土司屯種者人給田十畝兵領加給有差授田  
之初養以月糧資以牛種三年之後計畝科糧三  
升蠲其徭差著爲例